

四庫全書

史部

欽定四庫全書

史部

平定津噶爾方略正編卷二十八至
五十

詳校官監察御史臣孫家賢

總校官進士臣朱 鈐

校對官編修臣周厚轅

謄錄監生臣汪 瀾

欽定四庫全書

平定準噶爾方略正編卷三十八

乾隆二十一年夏五月癸酉

命尚書阿里察同前派副都統職銜公明瑞前往軍

營在領隊大臣上行走

副飭定西將軍策楞等

主諭軍機大臣回策楞等奏先派王保往哈薩克其
帶往兵丁令尼瑪烏爾登等帶回登努勒台牧放

馬匹等語謬誤已極從前降旨令王保先往哈薩克時因王保係專任追擒阿逆之人致令脫逃是以責令前往彼時策楞等俱已回至固勒扎即就近更至登努勒台牧放原無不可及策楞等接到此旨奏稱王保等已於前月初旬起程向哈薩克乃行已數日復旨令將兵丁撤回看此情節伊等並未進發特為此飾詞誣奏耳否則王保帶兵前進無故忽行撤回有是理乎如謂朕旨如此指示

何以擒賊之事伊等並不遵旨辦理在王保尚自知罪愆勉力前往而策楞轉欲令之獨行是誠何心若謂撤回至登努勒台可以收放則乘此夏令曠野何地無草又或因王保先行可以疾馳前進則王保去後策楞何以不相繼隨行以為策應顧於人則令之獨行在已則逍遙安住朕實不解著傳旨申飭並傳諭達爾黨阿不得因策楞行文遽行撤回即著隨王保奮勇前進迅奏膚功

命獎賞內大臣哈薩克錫喇

上諭軍機大臣曰此次進兵哈薩克錫喇甚屬奮勉
即如厄爾錐音至今尚留游牧並未前抵軍營而
哈薩克錫喇諸事實心深堪嘉予此時如伊已領
兵同進回時著歸伊游牧休息如尚未進兵亦暫
令到伊游牧看視再至軍營當亦不至遲悞並著
賞給荷包鼻煙壺各一件以示獎勵

甲戌

宣諭定西將軍策楞等貽誤軍務之罪

上諭大學士曰據策楞等奏現駐登努勒台將馬匹
收放並咨會達爾黨阿令其撤兵回駐并將玉保
所帶之兵亦令撤回收放馬匹等語達爾黨阿接
到咨會隨以伊現已帶兵前進且兵糧足數至七
月下旬無庸撤回一面咨覆一面具奏達爾黨阿
所見甚合機宜從來用兵之道有進無退況追擒
叛逆期在必獲斷無兵已進發復令撤退故使往

返稽頓之理朕前降旨令玉保帶領索倫兵五六
十名先往哈薩克索取阿逆隨令達爾黨阿帶兵
繼進策楞亦即帶兵尾隨節次諭旨甚明乃策楞
等不惟不能尅期前進反將玉保所帶之兵亦行
調回止令玉保以數十人先進豈不更為可駭信
如伊等所辦則是以追擒叛賊之事僅委之玉保
數十人而伊等安坐軍營且并欲奪其兵力而置
之危地此何心耶伊等身為將軍將佐功罪皆其

功罪玉保倘有債事策楞等能脫然事外乎至前
諭令將馬匹在登努勒台收放原因大兵未經進
發彼時策楞等觀望遷延藉口於馬力疲乏朕實
不勝憤懣是以令將未用馬匹收放臆壯即行進
發先令玉保輕騎前進以期速達耳今達爾黨阿
業經帶兵前進策楞不即行續進已屬大謬乃轉
稱遵旨將馬匹收放且將達爾黨阿已進之兵行
令撤回幸而達爾黨阿能知事勢輕重不肯隨聲

附和使竟聽其言聞調即行撤回將成何事體耶
此次追擒叛逆在庸懦無識之人未必不謂策楞
等坐失機宜實由馬力疲乏口糧不繼所致試思
經旬已進之兵旋復調撤回不即以此回程馬力
用之前進乎豈前進則疲乏而撤回則甚易乎如
此進而復退馬力豈不更加疲乏乎至於隨帶口
糧策楞等前赴軍營較達爾黨阿由北路起程先
期二十餘日何以據達爾黨阿所奏尚可敷數月

之用而策楞等則早稱缺乏且巴里坤續運口糧俱已起運在途而策楞等輒行文停止及至臨期需用乃向各鄂拓克索取伊等資生牲隻以致坐候不前又令玉保且行且待是伊等現在所奏馬力口糧之語均不可信不過以是藉口掩其怯懦之罪耳策楞等乖張謬誤種種不堪特借購集馬駝接濟牲隻為遷延之地其罪復何所逭耶用將此通行傳諭知之

命達爾黨阿為定西將軍兆惠為定邊右副將軍加
永貴副都統職銜在叅贊大臣上行走

上諭軍機大臣曰策楞等辦理軍務種種謬妄已降
旨宣諭中外策楞著努解來京治罪伊子特通額
著革職交與達爾黨阿令在軍前効力贖罪扎拉
豐阿本應同策楞一體治罪念伊係蒙古人從寬
革去郡王并副將軍令其回至巴里坤自備資斧
赴伊游牧王保此時如已帶兵向哈薩克即無庸

拏解若仍在達爾黨阿隊內即遵旨拏解來京治
罪達爾黨阿著補授定西將軍兆惠著補授定邊
右副將軍永貴著加恩賞給副都統職銜在叅贊
大臣上行走此旨著交阿里衮齎往俟至軍營遇
見策楞玉保等時再行宣諭

諭定西將軍達爾黨阿進兵機宜

上諭軍機大臣曰達爾黨阿不聽策楞撤兵之言徑
向哈薩克前進似此奮勉出力朕心甚為嘉許夫

以策楞身為將軍諸凡遠巡畏縮實堪駭指已降
旨將伊治罪但軍行宜計萬全方合機宜若一意
勇往不量情形所關非小今達爾黨阿帶兵前進
應詳探賊人形勢或用計襲或用力攻或待接濟
兵到并力擒勦慎勿冒昧輕試朕非阻止達爾黨
阿勇銳之氣恐伊有鑒於策楞等退縮不前之罪
矯往過正轉失之於太銳著將此旨交阿里衮帶
往轉諭達爾黨阿令其仰體朕意相機辦理以副

委任

諭定邊左副將軍哈達哈等進兵哈薩克事宜

上諭軍機大臣曰哈達哈等奏稱辦理烏梁海事竣
即前至哈薩克索取阿逆如不即擒獻暫且毋庸
進兵掠伊邊界人等增我兵力等語現在西路達
爾黨阿業已帶兵前進哈達哈應即速將烏梁海
辦畢前往哈薩克斷不可稍涉觀望再伊等有預
備馬匹口糧以為將來用兵之語是其心存畏怯

並不思一舉成功殊屬非是現在策楞因辦理軍務種種謬誤已將伊拏解治罪哈達哈想未聞知著將朕旨及策楞等原奏鈔寄閱看舒赫德現在哈達哈軍營伊從前與策楞同獲重譴加恩寬宥此次意見若出自舒赫德朕必將伊同策楞一體治罪哈達哈務宜奮勇爭先毋蹈覆轍再大兵進發理應分為兩隊今哈達哈等領兵不過三四千毋庸分隊且清滾扎卜策布登扎布俱係蒙古今

伊等帶兵前行管轄恐不能周若與哈達哈同隊
進發伊等熟悉情形一切事宜俱可商辦哈達哈
等即遵照辦理

命封巴圖爾額默根為扎薩克頭等台吉

上諭軍機大臣曰巴圖爾額默根上年投誠時未經
入覲朕曾施恩封伊子和通鄂勤為扎薩克頭等
台吉今巴圖爾額默根當阿逆擾亂之時並未附
和管轄屬人安居游牧甚屬可嘉亦著加恩封為

扎薩克頭等台吉

丙子

命西北兩路領兵速赴哈薩克

上諭軍機大臣曰據侍衛中秋奏稱詢問自阿逆處
逃出之厄魯特巴顏告稱阿逆惟同喇嘛及哈薩
克屬人三十餘人現在招摩多地方離阿布齊游
牧路止三站等語看此情形隨阿逆逃竄之人俱
各離散力甚窮蹙誠能迅速追逐早應擒獲今已

不免遲誤著傳諭達爾黨阿即照巴顏所供逆賊
逃往之路帶兵前進途中遇見阿逆離散藏匿之
人即行勦滅直入阿布齊游牧悉力搜捕務期弋
獲從前諭令領兵至哈薩克邊界勒取阿逆毋庸
進兵因尚不知阿逆果否逃往自不便即加以兵
威今偵探既確而哈薩克若不即遵諭擒獻則是
有心容隱應即將哈薩克辦理達爾黨阿等務大
振軍威勿稍示怯亦毋庸拘泥從前之旨已令中

秋將巴顏解往達爾黨阿軍營可詳細詢問情形
帶領前往再巴顏供阿逆處現止烏勒木濟同行
並未言及阿巴噶斯哈丹等阿巴噶斯等或已回
至游牧或在中途隱匿達爾黨阿沿途留心查訪
一并擒拏解京治罪並傳諭哈達哈等即將烏梁
海事辦竣領兵徑赴阿布賚游牧會同西路大兵
奮力勦捕毋得少有遲誤

命授普爾普為散秩大臣

上諭軍機大臣曰前命策楞等至伊犁時查拏阿睦爾撒納之姊扣肯今據奏稱已為普爾普擒獲現在解送前來等語普爾普著加恩授為散秩大臣遇有宰桑員缺仍奏聞請旨補授

己卯

諭西北兩路將軍等進兵哈薩克機宜

上諭軍機大臣曰據達爾黨阿奏現已領兵前往哈薩克不俟已里坤解到馬匹等語所奏甚合機宜

阿逆素性奸詐必須迅速進兵出其不意方為有益從前遣達永阿等由西路前往順德訥等由北路前往降旨曉諭哈薩克今達爾黨阿哈達哈率兵至哈薩克邊界若候達永阿順德訥等信息始行前進倘伊等在阿布賚處少為稽留以致淹遲時日反失機會且達永阿順德訥等子身奉使亦不可無兵力接應著傳諭達爾黨阿哈達哈等至哈薩克邊界時即帶兵深入所過地方告以但為

擒拏逆賊毫無侵擾令其各安居游牧伊等若無
抗拒情形應嚴禁我兵不得滋擾其或托詞阻撓
即加以兵威無少示怯第恐我兵既進哈薩克等
或從後掩襲亦不可不豫為防範達爾黨阿等務
期相度機宜迅奏膚功

命授三等侍衛巴圖濟爾噶爾為頭等侍衛賞銀一
百兩馳驛前往達爾黨阿軍營聽候調遣

命授宰桑密瑪克等官爵

上諭軍機大臣曰據達爾黨阿奏達什達瓦宰桑密
瑪克得木齊布圖庫等懇請隨軍營効力擒拏阿
逆等語密瑪克等誠心懇請甚屬可嘉著加恩授
密瑪克為管旗章京布圖庫為佐領俱賞給翎頂
以示鼓勵

庚辰

命調扎卜堪駐劄兵丁前赴哈薩克

上諭軍機大臣曰據舒明等奏將扎卜堪駐劄兵二

千餘名內調撥五百名交待衛三都卜帶領往布
延圖等處駐防等語著照所奏辦理扎卜堪駐劄
兵丁尚有一千五百餘名現在哈達哈辦理烏梁
海事竣即由彼赴哈薩克此項兵丁與其在扎卜
堪間往不若揀選一千名隨哈達哈等陸續進發
則兵勢益盛著傳諭舒明等將扎卜堪所餘兵丁
內挑選一千名辦給馬匹口糧前赴哈薩克並於
栢起三都卜二人內酌派一人帶領若唐喀祿已

到軍營即領其帶領前進

訓諭定邊左副將軍哈達哈等擒賊事宜

上諭軍機大臣曰哈達哈奏北路所帶馬匹牲畜不能肥壯現在勉力行走等語此不過留為日後推卸之地耳前令伊等由烏梁海進兵哈薩克原因辦理烏梁海之後取其牲畜馬匹以增兵力更易集事伊等若因阿逆係由伊犁脫逃擒拏之責應專委之西路北路相距遼遠又越烏梁海而行以

此藉口逡巡觀望不但不能副朕委任直是自取
罪戾耳哈達哈等如果奮勇自効朕必加以殊恩
倘一味退縮雖多方支飾亦豈能逃朕洞鑒況現
在西路止帶兵二千餘名北路兵丁已及四千今
又派扎卜堪駐劄兵丁一千名隨後策應以兵力
多寡較之北路應更加出力方為勇往任事哈達
哈等惟當速期成功不得稍存岐視

辛巳

命查拏阿逆遣往回部人等

上諭軍機大臣曰策楞等奏回人伯克噶岱默特稟稱曾遇阿逆差往回部之人將伊砍傷今與伯克烏第同來投誠等語阿逆詭計百端各回部地方必潛遣人前往煽惑若不嚴行查拏恐致妄生事端著傳諭策楞等速即行文知會前次遣往葉爾羌喀什噶爾人員曉諭各回人等所有阿逆遣往之人盡行查拏治罪毋令脫逃

命策楞等確勘古爾班和卓情形

上諭軍機大臣曰玉保等奏稱奇爾吉斯宰桑古爾班和卓等帶領戶口渡伊犁河隨派扎薩克達克巴等擒其屬人詢問情形旋據古爾班和卓等遣人稟稱並非往投阿逆懇求移至阿爾台地方等語扎薩克達克巴差委効力奮勉可嘉著施恩賞給孔雀翎並傳諭策楞等確堪古爾班和卓等如果移往阿爾台地方俟其至時另行安插若在伊

犂觀望顯有從賊情形策楞等即會同尼瑪滾楚克扎卜等所領兵丁奮力勦捕取其馬匹牲隻以助大兵進勦之用

癸未

命派兵隨達爾黨阿後續赴哈薩克

上諭軍機大臣曰據達爾黨阿奏稱現領索倫兵六百餘名前進等語看來達爾黨阿帶兵甚少必需續為進發已令巴祿速行繼進其海福所領兵丁

亦即速前往再策楞所帶索倫等兵一千餘名即日趕赴尼瑪令其帶往俟遇達爾黨阿特仍將索倫察哈爾等兵丁交與管轄策楞仍遵前旨回至伊犁駐劄辦事

甲申

命寧夏鎮總兵官李中楷駐防哈密

大學士管陝甘總督黃廷桂奏言哈密東距安西一千餘里西距巴里坤三百餘里地處適中

安西巴里坤既各駐有大員哈密似可無需專
員駐劄但現在辦理軍需之際一切管理臺站
彈壓官兵募養馬駝轉運糧餉各事宜均須大
員料理遵

旨於陝甘兩省總兵內揀選得寧夏鎮總兵官李中
楷屢次出兵熟悉軍務堪以駐劄辦理奏入報
聞

乙丑

宣示策楞玉保等擒賊不力罪狀

上諭大學士曰玉保奏稱據從哈薩克逃回之巴布
噶津告稱阿逆逃至哈薩克界內納喇巴圖等計
圖擒獻協力追捕已將叛賊所隨人衆勦滅現只
帶兩三人逃竄阿布賚處等語與侍衛中秋詢問
巴顏所供阿逆攜帶三四十人逃竄之語正相符
合特中秋末向巴顏詳悉詰問緣由未得哈薩克
勦殺叛賊實在情形故有三四十人之說耳阿逆

負恩背叛反覆詭詐伎倆人人共知朕早料哈薩克不肯容納必至竄匿無歸今果止攜二三人奔逸可見策楞等若早能振作軍聲疾馳前進則叛賊早已就擒軍務當早經告竣而乃畏縮不前坐失事機即如前此諭令遴選將弁曉諭哈薩克而策楞等輒恐其羈留我使致開釁端遷延觀望仍不即時遣往今觀哈薩克之恭順如此逆賊之竊感如此一一不出朕所夙料而策楞王保二人全

無領會動輒後時所賴者

上天默佑朕惟有額手敬承益加兢惕耳若如伊等之
步步瞻顧縱賊遠颺間外之任將何賴焉再王保
奏稱即日前往哈薩克乃明知叛賊子身無助始
敢直前追逐仍係取巧故智不然何前此恇怯之
至幾於草木皆兵而今則一似勇敢任事毫無疑
慮者此亦何能逃朕洞鑒耶將此宣諭中外知之
命叅贊大臣富德等進兵哈薩克

上諭軍機大臣曰富德等此次追緝唐古忒沿途擊
敗哈薩克各事宜甚屬奮勉富德莽阿納奇徹布
並伯什阿噶什之子博東齊散秩大臣達什策凌
都噶爾宰桑烏爾古勒濟勒卓特巴伯克孟克等
俱著賞給荷包鼻煙壺以示獎勵仍加恩授達什
策凌為內大臣烏爾古勒濟勒卓特巴為散秩大
臣聞伯什阿噶什遭哈薩克擾亂遷徙他往著博
東齊前往尋覓遇見即行奏聞倘有不測朕自加

恩於博東濟其游牧即准在額爾齊斯地方居住
並著伊宰桑諾斯海等悉心善為保護至達什達
瓦宰桑訥默庫曼集於一切差委事宜甚屬奮勉
著加恩授為三品總管賞戴孔雀翎侍衛蘇珠克
圖著授為二等侍衛得木齊三都克博貝厄爾欽
哈什哈勞章津巴等俱著授為藍翎侍衛傳旨獎
諭頃據玉保奏聞阿逆僅於兩三人投往哈薩克
阿布賚處玉保已領兵前往索取富德等接到此

旨不必追緝唐古忒即由彼處前赴哈薩克協力擒拏逆賊莽阿納達什策凌俱著在叅贊大臣上行走一同帶兵速進此時各路兵丁應已齊集富德等會同前往兵勢益盛務期協助達爾黨阿等擒獻逆賊迅奏膚功歸途之便仍將唐古忒擒拏治罪

丁亥

命蠲免甘涼肅等處本年應徵各項錢糧

上諭大學士曰甘省一應軍需多於甘涼肅等府州縣就近採辦雖一絲一粟皆取給公帑即輓運轉輸之事亦必計丁給值不以派累閭閻但此數郡小民急公趨事較之他屬倍覺勤苦出力朕心深為軫念著加恩將甘省之甘涼肅等府州縣民戶屯戶及番民等本年應徵各項錢糧米豆草束一概蠲免其有已經完納者按數扣出准作來年正供

戊子

命辦解達爾黨阿軍營口糧

上諭軍機大臣曰據黃廷桂奏達爾黨阿處兵丁口糧尚可支給三月惟策楞處兵糧現在急須接濟等語策楞進兵不過先達爾黨阿一月之期何以達爾黨阿處尚有三月之糧而策楞等已需接濟領兵將帥果能與士卒同甘苦諸事加意整飭不獨糧糈一項不至糜費何者不可得力策楞全不

以為事一任兵丁耗用方至告匱今達爾黨阿帶
兵深入哈薩克自應接濟糧餉資其食用倘策楞
以達爾黨阿軍營尚有三月之糧將送往口糧盡
留伊處則斷無是理著傳諭策楞糧到之日先儘
解達爾黨阿處其餘酌留伊軍營支給

命獎賞擒拏逆賊唐古忒之烏魯木等

上諭軍機大臣曰據巴祿奏稱散秩大臣輝特宰桑
烏魯木生擒逆賊唐古忒并勦滅伊屬人等烏魯

木現已移至阿爾台地方等語烏魯木深感朕恩
奮勉効力甚屬可嘉著傳諭舒明阿蘭泰等俟其
移至阿爾台時傳旨獎諭賞銀一百兩酌量指與
地方安插至陣亡之得木齊特古斯墨爾根哈什
哈及兵丁三十餘人亦屬可憫著交烏魯木查明
特古斯墨爾根哈什哈如有子嗣仍授為得木齊
並賞銀三十兩其陣亡兵丁三十餘名俱各賞銀

十兩

己丑

以達什達瓦宰桑訥默庫曼集自軍營逃回游牧

命巴里坤辦事大臣和起等擒拏正法示衆

上諭軍機大臣曰達什達瓦宰桑訥默庫曼集在富德軍營行走昨因其奮勉効力加恩授為三品總管乃不遵守法令私自逃回游牧殊屬可惡若不從重治罪無以示懲著傳諭和起等俟訥默庫曼

集回至游牧即行擒拏將伊不遵約束私自逃回
情罪曉諭鄂齊爾布林托里等並達什達瓦部衆
人等知悉即行正法其所屬兵丁不過聽從指使
情尚可原著免其治罪

諭輝特台吉巴雅爾

上諭巴雅爾曰覽爾奏並請將所屬人等戶口照都
爾伯特台吉策楞等所屬編次旗分佐領永圖生
聚朕實嘉之爾既向化歸誠率屬內附所有編次

旗分佐領之事不必急於辦理爾即於所屬宰桑
內擇其才具可用者奏明授為管旗章京副管旗
章京及叅領佐領之屬使之善為約束安分謀生
即無異內地臣僕朕於沙克都爾曼濟之奏亦如
此降旨上年平定準噶爾全部之時原為爾等籌
畫安全俾共登之衽席不意阿逆背叛滋擾不特
爾之所屬生計拮据即全部二十一昂吉亦皆不
得寧居朕是以復命將興師殲除逆賊俟阿逆擒

獲後朕降旨曉諭哈薩克部落各守邊界毋得少
有侵犯爾等自可耕種牧養各務本業數年之後
生計日見豐裕朕實不勝厚望爾惟仰體朕心管
轄部衆嚴禁盜賊以副朕一視同仁之意寄賞爾
緞疋荷包爾其祇受

辛卯

命籌辦北路軍營糧石

上諭軍機大臣曰昨據永貴奏稱北路軍營現存米

十二萬一千餘石可敷一萬兵丁四年之用等語
此惟計算儲備軍需共賞給各部落屬人口糧一
項未經籌及都爾伯特輝特人等明歲雖各歸游
牧但現在伯什阿噶什之子博東齊及達什策凌
烏爾古勒濟勒等俱將游牧移至阿爾台地方尚
須賞賚著傳諭普慶阿思哈等約計從前賞賚都
爾伯特輝特人等每年應須糧石若干所有現存
糧石足支辦給軍需並賞賚新來歸降人等幾年

之用詳悉具奏至賞給厄魯特口糧原因其饔飧
不給暫為補助並非定為成例即如伯什阿噶什
之子博東齊等前來之時其中果有並無牲畜不
能度日者即酌量資給若現在可以餬口不得俱
照策凌等之例一概賞給並著傳諭舒明阿蘭泰
等遵照辦理

癸巳

申諭定邊左副將軍哈達哈領兵速赴哈薩克

上諭軍機大臣曰據哈達哈等奏稱領兵至哈屯河
水勢甚大將已經渡河兵六七百名令青滾雜卜
帶領輕騎前往其餘兵丁一千餘名製造小船更
番渡河令策布登扎布帶領繼進等語哈達哈身
為將軍理應身先士卒奮勉直前不得稍存觀望
之意今青滾雜卜策布登扎布俱已輕騎前進而
哈達哈獨駐河干何以督率將領若似此遲延未
知何日始抵哈薩克必致貽誤大事關係非淺觀

其所奏河水情形不過山水下流一時陡漲數日
間即可減退且覓其淺處未嘗不可徑渡何至如
此張皇從前朕已察其有遲疑之狀是以屢經降
旨訓諭今計此旨到日哈達哈自當已抵哈薩克
境內務宜加意奮勉斷不得稍存畏憚自取罪戾
以達什達瓦宰桑烏達瑚們都自軍營私逃

命巴里坤辦事大臣和起等一并正法示衆

上諭軍機大臣曰前因宰桑訥默庫曼集自軍營私

回游牧已降旨交和起等擒拏正法今據富德奏
稱尚有宰桑烏達瑚們都亦同訥默庫曼集私回
著將烏達瑚們都一同拏獲正法餘仍照前旨辦
理

丙申

諭策楞等擒拏古爾班和卓

上諭軍機大臣曰據策楞等奏稱古爾班和卓已經
擊敗收其馬匹牛羊前赴哈薩克等語策楞等此

舉蓋因從前朕屢責其不能擒拏阿逆始少加振
作耳然首犯現已脫逃且奏稱古爾班和卓共帶
八千餘人官兵奮擊斬首二千餘級餘衆鼠竄潛
逃等語其所陳奏情形尚屬可疑古爾班和卓果
有八千之衆雖勦殺二千餘人尚餘六千非甚窮
蹙何以遽行逃竄如其人已無多自可無庸置念
若果如所奏向有六千餘衆則或潛伏一隅俟我
兵經過後尾隨邀截皆未可定不可不豫為防範

現在伊犁辦事乏人策楞接到朕旨即回伊犁不
必前赴哈薩克惟傳諭各鄂托克人等協力擒拏
古爾班和卓一經緝護即押解來京治罪此次疎
脫古爾班和卓咎在將軍大臣官兵尚屬奮勉侍
衛瑚集圖率五十餘人奮勇爭先尤屬可嘉著加
恩授為頭等侍衛其餘著有勞績及中傷陣亡官
兵等策楞即查明具奏候朕加恩並寄交策楞等
藍翎二十枝查明奮勉人員酌量賞給

命封扎薩克達克巴公爵

上諭軍機大臣曰此次擊敗古爾班和卓扎薩克達克巴甚著勞績著加恩封授公爵以示鼓勵

命授台吉昆都斯車克爾為扎薩克

軍機大臣奏言據策楞等奏稱從前台吉昆都斯車克爾等投降時查有所領戶口甚多奏請加

恩奉

旨封昆都斯車克爾等公爵今據哈薩克錫喇告稱
昆都斯車克爾兄弟所領戶口雖多皆係台吉
貝克管轄今授以公爵稍覺過優所有前奉
諭旨尚未宣示等語奉

旨令臣等議奏查策楞等從前未經查明昆都斯車
克爾等係閒散台吉但據其所領戶口奏

聞是以

授為公爵今應照加

恩閒散台吉之例將昆都斯車克爾等俱授為扎薩克奏入

上從之

定議西北兩路准通商販事宜

大學士管陝甘總督黃廷桂疏奏西北兩路請准照舊通商事宜一摺得

旨軍機大臣議奏尋議雍正年間北路軍營與西路哈密巴里坤一帶俱有大兵駐劄彼此商販原

許流通貿易迨撤兵之後設有卡倫不許擅行
出入乃專指赴準噶爾之路非赴哈密內地之
路也是以歷年商販俱仍照舊貿易迨乾隆十
九年北路鼐曼明安卡倫侍衛差人赴哈密置
買食物前任提督王進泰行文左副將軍將侍
衛等叅革一切交易人等不許出入辦理原屬
未善往年西路軍營所需牛羊多借資於北路
商辦今巴里坤為軍營駐劄之地而一應牛羊

等物祇專由肅州一帶購販前往路途遼遠難
資接濟是以價值騰貴且伊犁平定以後與從
前應行防範情形迥異兩路商販自應准其流
通應如黃廷桂等所奏行文軍營大臣即速曉
諭兩路官民商販凡有載運牛羊貨物往來交
易者許向該管大臣請給印票照驗放行至守
卡官兵就近向巴里坤哈密置買食物者亦仍
聽其自便奏入

上從之

六月戊戌

命通瑪木特幼子沙津巴圖承襲散秩大臣

上諭軍機大臣曰通瑪木特之子賽音伯勒克現在
病故所有散秩大臣職銜著加恩將通瑪木特幼
子沙津巴圖承襲

己亥

命達什策凌等補授扎爾呼齊

上諭軍機大臣曰策楞等揀選堪以補授扎爾呼齊之宰桑等開列請旨左翼扎爾呼齊員缺著達什策凌補授右翼扎爾呼齊二缺著克勒特宰桑巴桑伊克巴爾達穆特宰桑圖布慎補授

辛丑

命授噶勒雜特宰桑根敦為佐領

上諭軍機大臣曰據舒明等奏噶勒雜特宰桑根敦得木齊巴圖孟克率所屬九十餘戶投誠等語根

敦等被烏梁海等刦掠率屬來歸甚屬可憫著加
恩授根敦為佐領賞緞二疋暫與丹畢游牧同居
前聞噶勒雜特宰桑止哈薩克錫喇都噶爾特克
勒德克等三人根敦或係宰桑子弟或係得木齊
誤稱為宰桑均未可定今暫授為佐領俟詢明哈
薩克錫喇等具奏到日應授何職銜再降諭旨並
著舒明傳諭根敦等現在伊犁平定與內地無異
伊等或歸故土或在此地游牧悉從其便此時念伊

等遠道前來復被烏梁海刦掠暫為休息再圖遷徙至奏請來京入覲現今天時暑熱根敦或尚未出痘且無庸令其前來至有所稱途中遇刦之烏梁海等現在逃赴阿逆處等語著傳諭達爾黨阿哈達哈等沿途留心遇此等投赴阿逆之烏梁海等即行勦滅並將為首之人拏解來京治罪

壬寅

命授索倫佐領由屯為協領

上諭軍機大臣曰據達爾黨阿奏管領索倫兵丁佐領由屯上年進兵在哨探隊內行走甚屬奮勉此次後多勞績等語由屯著加恩授為協領遇缺即補仍賞戴孔雀翎以示鼓勵

癸卯

諭定邊左副將軍哈達哈等速赴哈薩克

上諭軍機大臣曰據哈達哈等奏辦理烏梁海等事已將竣惟首犯鄂木布呼圖克郭勒卓輝等尚未

拏獲等語前哈達哈帶兵渡哈屯河時止令青滾
雜卜策布登扎布等先行而伊獨逗留河干朕已
降旨申飭哈達哈身為將軍理應身先士卒何故
逡巡不前今辦理烏梁海事雖多所斬獲而首犯
脫逃皆伊不能督率用命之故此時亦毋庸深究
著即將烏梁海辦畢速赴哈薩克緝拏逆賊毋得
仍前玩誤舒赫德隨同哈達哈辦事甚屬無益不
必前赴哈薩克著即回至烏里雅蘇台辦理糧餉

事務

命賞都爾伯特親王策凌烏巴什等屬人米石

上諭軍機大臣曰據舒明等奏策凌烏巴什巴圖博
羅特及達瑪林等屬人生計稍艱請旨賞賚等語
策凌烏巴什等遠移游牧生計不能充裕前已加
恩賞給籽種現在播種未屆收穫之期著再加恩
賞米六百石分給接濟以示體卹

甲辰

宣諭達什達瓦宰桑訥默庫等帶兵擅回游牧罪狀
上諭軍機大臣曰和起等將達什達瓦所屬宰桑訥
默庫曼集烏達瑚們都等帶兵擅回之處訊明復
以伊等係新降之人未諳法律陳奏殊屬謬誤達
什達瓦屬人歸誠以來疊施厚恩昨派赴軍前効
力又與內地兵丁一體賞給製裝銀兩乃訥默庫
曼集等不遵法令擅自回至游牧情罪甚屬可惡
昨經和起等奉到朕即降旨令將訥默庫曼集等

正法其兵丁係聽從指揮加恩寬免所以不將兵
丁一併治罪者特因伊等係新降之人故從寬典
至宰桑乃領兵之人豈得曲從寬宥現在將伊等
移往阿爾台安插若如此藐法誤公不示儆戒何
以申明國憲和起等審訊既確而復為此陳奏其
意惟恐訥默庫曼集等正法後致達什達瓦屬衆
心懷疑貳妄生事端果有此情正當使知法律森
嚴不容輕犯豈得苟且姑容以示怯懦料和起尙

不至此此必出於錫特庫之意著傳旨申飭訥默庫曼集烏達瑚們都仍著即行正法

丙午

叅贊大臣巴祿疏奏擒獲賊黨阿巴噶斯喀丹等解送京師

巴祿奏言五月二十三日據宰桑庫圖齊遣賽音伯勒克查得阿巴噶斯等藏匿博羅和里雅地方臣即帶領庫圖齊等星夜馳赴率領驍騎

校音達爾錫護軍校袞布齊里木護軍三濟等
將阿巴噶斯哈丹和津等三人拏獲并獲跟隨
之烏魯木濟等六人派侍衛根敦色楞將賊黨
阿巴噶斯哈丹和津等解送京師奏入

上諭軍機大臣曰據巴祿奏阿巴噶斯等匿處博羅
和里雅山中帶兵前往將阿巴噶斯哈丹和津及
其隨從六人全行拏獲等語巴祿一聞阿巴噶斯
等藏匿地方信息即能率兵前拏俾無漏網甚屬

奮勉可嘉著賞給荷包鼻煙壺以示獎勵宰桑庫
圖齊著賞緞六疋其探信之賽音伯勒克著授為
三等侍衛賞緞三疋擒拏阿巴噶斯哈丹之驍騎
校音達爾錫護軍校袞布齊里木俱授為三等侍
衛擒拏和津之護軍三濟授為藍翎侍衛每員各
賞銀二十兩其渡河淹沒之人照陣亡例恩卹所
有跟隨阿巴噶斯等烏魯木濟等六人即著賞給
庫圖齊為奴又

諭曰昨據策楞奏庫本諾雅特台吉特古斯們都阿
道齊投至軍營訴稱阿巴噶斯因伊弟至庫克烏
魯木地方患病不能行走遂不與阿睦爾撒納同
行潛往特古斯們都處居住現在嚴檄擒拏今據
巴祿奏到聞阿巴噶斯藏匿博羅和里雅地方即
親率官兵一晝夜兼行倍道前至該處已拏獲阿
巴噶斯及伊弟哈丹和津等語阿巴噶斯首先附
和阿逆助惡相濟為之羽翼後隨同奔逸今乃率

其兄弟三人潛歸伊游牧地方觀此則其窮感情
形之阿逆衆叛親離毫無倚賴之狀昭然可見已
祿聞知阿巴噶斯所在即能帶領官兵踰山涉水
星馳疾掩應時擒獲可見此等逋逃餘孽我官兵
果能鼓勇窮追自必就獲而當阿逆逃竄之時距
我軍營甚近乃王保策楞妄生疑阻坐令遠颺由
今日阿巴噶斯之就擒觀之則前日阿逆之免脫
豈不令人憤懣耶且如辨里額林沁一事在策楞

等方且自以為功殊不知額林沁挺身前赴軍營
原有歸順之意若能善加撫馭令為前驅未必不
為我用即不然則當速行勦取伊之輜重藉其牲
隻之力前進捕賊乃一無計畫以致額林沁人眾
疑畏徘徊任其四散僅得一老億之額林沁亦旋
即病斃於事何濟又如辦理古爾班和卓則僅得
其牲隻老弱而渠魁仍復竄逸伊等身任戎行種
種乖謬貽誤如此罪將奚追豈達爾黨阿巴祿所

將之兵皆勇夫所騎之馬皆肥壯所裹之糧皆足
數而策楞身為將軍所有兵馬糧石反不如人耶
巴祿及在事官兵辦理妥協甚屬可嘉已另降旨
并將此宣諭中外知之

命仍授鄂勒椿洪郭爾等為台吉

上諭軍機大臣曰據阿敏道三格奏稱烏魯木台吉
薩喇爾業經正法其妻孥僕人什物等亦俱查明
伊兄鄂勒椿弟洪郭爾等現在看守俟扎那噶爾

布到時轉交等語此奏甚屬含糊薩喇爾係獲罪之人理應治罪其妻孥家產著遵旨賞給扎那噶爾布至伊兄弟並無罪犯不應一律辦理著傳諭兆惠阿敏道三格等將鄂勒椿洪郭爾仍授為台吉其所屬戶口並著給還

命尚書阿里衮副都統職銜公明瑞領兵協同前進達爾黨阿奏言頭等侍衛海福帶兵三百餘名於五月十九日至古爾圖喀喇烏蘇地方病故

此項兵丁並兆惠所領兵一千名除駐劄安濟
哈雅五百名外尚餘五百名共兵八百名應派
大員帶領近奉到

諭旨命副都統職銜公明瑞前赴軍營効力請俟明
瑞到時即交與帶領奏入得

旨著阿里衮明瑞協同帶領此項兵丁前進

平定準噶爾方略正編卷二十八

欽定四庫全書

平定準噶爾方略正編卷二十九

乾隆二十一年夏六月丁未

叅贊大臣富德疏奏擒獲逆黨恩克巴雅爾等
及進兵哈薩克情形

富德奏言據驍騎校畢齊罕口等擒獲阿逆所
屬台吉恩克巴雅爾等四十餘人查恩克巴雅
爾等係從前投誠之人附和阿逆逃往哈薩克

地方今計窮力竭復來歸附情罪可惡已將巴桑等四人正法其恩克巴雅爾明噶特俄羅斯等解赴北路軍營以備審訊再臣奉到諭旨令回京面聆

訓誨今既知阿逆逃往哈薩克確信而兩路軍營一時並進臣現在領兵至塔爾巴噶台容臣會同兩路軍營大臣前進俟擒獲逆賊後遵

旨赴京奏入

上諭軍機大臣曰前曾降旨令富德來京今據奏到擒獲逆黨恩克巴雅爾等知阿逆竄入哈薩克確信請仍帶兵前進等語富德奮勇可嘉著加恩補授正黃旗蒙古都統以示獎勵現在西北兩路將軍等領兵前往哈薩克富德就近迎往無論遇見何路即一同前進如更有捷徑可至哈薩克即著富德率領達什策凌等徑行前往或先遣奇徹布赴阿布賚處曉諭令其擒獻阿逆至伊等所帶兵

丁不多不必更分前後兩隊從前西路哈薩克錫喇等奏請帶領厄魯特兵丁朕已停其派往止令哈薩克錫喇屬人數百名隨行今達什策凌既請率其所屬兵丁著准其帶往其西路未經派出厄魯特兵丁之處併諭達什策凌知之厄魯特等生性貪婪進兵時不免肆行搶掠富德務留心防範如敢有違即行正法以示懲戒

命賞給噶爾丹達爾扎等屬人口糧

上諭軍機大臣曰據普慶等奏台吉噶爾丹達爾扎
普爾普策凌等初從準噶爾回至游牧生計稍艱
等語噶爾丹達爾扎等所屬戶口著加恩賞給口
糧兩月以示體卹其普爾普策凌戶口請編為旗
分佐領歸入旺親扎卜旗內事宜著普慶舒明等
妥協辦理

命免治色沁逃人托郭斯等罪

上諭軍機大臣曰據舒明等奏上年勦滅色沁時逃

人托果斯及子特穆爾等現俱投來請旨正法等語此等逃人理應治罪但現在畏罪來投尚可寬宥著免其正法賞給喀爾喀等為奴

戊申

諭定邊左副將軍哈達哈等辦理烏梁海事宜

上諭軍機大臣曰昨哈達哈等奏請速赴哈薩克其烏梁海脫逃之人未及追趕辦理尚知緩急已降旨准行第恐伊等接奉此旨遂將烏梁海事宜置

不辦亦未可定著傳諭哈達哈等俟擒獲阿逆後
仍將隱匿及逃亡之烏梁海等盡行查辦其餘應
行安撫及每歲作何輸納貢賦事宜并著妥協辦
理

己酉

命授達瓦固英哈什哈等為特楞古特罕桑

原任定西將軍策楞等奏言臣等勦滅古爾班
和卓時將投誠之達瓦釋放令其協同擒賊今

據達瓦將賊人伊克敦多克巴圖孟克博什等
擒獲解到臣等查伊克敦多克係與古爾班和
卓同謀背叛即行正法其巴圖孟克等尚屬可
原應革去宰桑請

旨釋放至達瓦原係宰桑烏默什之子帶伊所屬七
百戶來降今又擒獲賊衆應請

旨即授為特楞古特宰桑又據遣往葉爾羌之特楞
古特宰桑固英哈什哈回至軍營告稱上年將

軍等遣伊同侍衛托倫泰等前往葉爾羌等處
曉諭後與葉爾羌回人對敵多所斬獲忽有阿
逆遣往之人告知伊犁被陷情形托倫泰等現
為回人擒獲我於正月內回至游牧宰桑事務
已有敕多克管理乃係阿逆羽翼我妻子俱被
擒擄等語查固英哈什哈原係宰桑亦應請
旨仍行補授奏入報

聞

辛亥

諭定西將軍達爾黨阿遣派塔本集賽兵丁事宜

上諭軍機大臣曰富德奏塔本集賽宰桑達什策凌
請帶伊所屬兵丁前往哈薩克朕已允其所請第
恐達爾黨阿仍遵從前所降之旨不令厄魯特兵
丁前往亦未可定塔本集賽游牧距哈薩克甚近
且伊等曾被哈薩克擄掠前進時必能奮往出力
其別處厄魯特兵丁仍無庸派往

癸丑

命復授劉統勲為刑部尚書

上諭大學士曰劉統勲從前妄議棄巴里坤退守哈密正當逆賊初叛之際朕恐其搖動人心阻撓軍務且使果如所言阿逆何至窮蹙無歸束手竄入哈薩克觀其至伊犁而不能守更復有何伎倆敢於侵擾內地則巴里坤之斷無可棄理亦甚明是以將伊革職治罪然當其時劉統勲因目擊永常

勿遽情形驟聞其言未能深察是以張皇失措夫
永常身為將軍膺閫外之重寄尚且怯懦退回甘
心債事劉統勲本係書生未嫻軍旅其所陳奏識
見固屬冒昧舛謬尚為乃心公事假使彼時藉口
於職在文臣辦理軍需不豫師行進止模稜觀望
緘默自守轉可安然無事且如策楞玉保等皆統
兵大臣當阿逆窮蹙遁逃距軍營密邇乃仍徘徊
不進坐致遠颺彼二人者皆滿洲蒙古世僕勇敢

舊風未遠而皆選懦至此以劉統勲文怯漢人相
提並論則其過為可諒而其心轉為可嘉矣劉統
勲著加恩補授刑部尚書

甲寅

命獎賞內大臣尼瑪哈薩克錫喇等

上諭軍機大臣曰尼瑪哈薩克錫喇此次効力軍前
甚屬奮勉已加恩封授公爵俱著賞戴寶石帽頂
雙眼翎以示優眷

乙卯

命解逆黨巴朗來京

上諭軍機大臣曰據達爾黨阿奏自阿逆處逃出賊人巴朗已解赴巴祿處令為嚮導擒拏阿巴噶斯等語現在阿巴噶斯等俱已擒獲巴朗著即派員押解來京

丙辰

命賞賚投誠宰桑賽音伯勒克等

上諭軍機大臣曰舒明等奏伯什阿噶什宰桑賽音
伯勒克等帶領戶口來降伊等中途被哈薩克搶
掠情形可憫著加恩賞寨音伯勒克緞四端得木
齊恩克濟爾噶爾等緞各二端現在伯什阿噶什
為哈薩克所逼未知逃避何處伊子博東齊已領
兵前往尋覓賽音伯勒克等或即在此居住或前
往會合博東齊俱聽其自便並傳諭舒明等詳察
賽音伯勒克等情形如需酌量接濟奏聞請旨

丁巳

命議處侍讀學士富森等

上諭軍機大臣曰富森派往遷移達什達瓦屬人起程一月餘始抵巴里坤任意遲延著交部嚴加議處錫特庫乃駐劄巴里坤辦事大員經富德將軍前私行逃回之宰桑訥默庫曼集等行文知會應即請旨正法乃游移兩請經朕嚴加申飭降旨將訥默庫曼集等正法以昭懲儆錫特庫辦理此事

有意姑息亦著交部嚴察議奏

命吐魯番回人莽噶里克暫停入

覲

上諭軍機大臣曰雅爾哈善等奏吐魯番回人莽噶里克貢獻馬匹請率伊弟額什里木子呢雅斯同來入覲等語莽噶里克感戴朕恩誠篤可嘉第現在令大兵擒拏阿逆而準噶爾地方連年擾攘匪竊甚多伊游牧內正須管轄此次著於伊子弟中

派出一人來京莽噶里克著暫傳入覲俟一二年
後再行請旨

賊黨烏魯特宰桑和爾和岱正法

原任定邊右副將軍扎拉豐阿奏言烏魯特宰
桑耨德勒齊擒拏伊同族宰桑和爾和岱前來
告稱上年我等共議出兵擒拏阿逆和爾和岱
並不遵行反將我擒送阿逆處又阻止烏魯特
鄂拓克人等不向內地遷移今次派兵伊又托

病不赴應行治罪等語臣等訊得和爾和岱附
和阿逆情形屬實即行正法示衆奏入報

聞

戊午

諭定邊左副將軍哈達哈等行文俄羅斯索取烏梁
海逃人

上諭軍機大臣曰哈達哈等奏烏梁海宰桑鄂木布
之子博羅特等已逃入俄羅斯境內伊等止遣人

索取不即領兵前往所辦尚合機宜此等逃人無甚緊要第行文俄羅斯地方自必擒獻原無庸領兵追捕若阿逆投至其地則大兵即當尾追擒拏不得照此辦理也著即派策布登扎布帶兵赴俄羅斯邊境索取俟烏梁海逃人送到時將首犯派幹員速解來京餘即在該處正法

庚申

諭定西將軍達爾黨阿擒拏古爾班和卓事宜

上諭軍機大臣曰策楞等奏跟隨王保前往引導之
鼐勒察克回至軍營告稱王保前赴哈薩克中途
遇有賊人共相迎敵等語奏內並未聲明係何人
迎敵看來不過古爾班和卓逃人及彼處窮餓無
聊之衆耳此皆策楞從前疎脫古爾班和卓不行
追捕所致達爾黨阿即帶鼐勒察克前往務將古
爾班和卓擒獲倘與阿逆同入哈薩克境內亦必
責令擒獻派幹員解京治罪如鼐勒察克並未見

賊人實在情形私回軍營捏詞稟告即將竄勒察
克正法示衆

恩卹內大臣瑪木特妻子

上諭軍機大臣曰普慶等奏瑪木特之妻及伊子策
凌達什出痘身故等語從前瑪木特感戴朕恩誠
心効力伊孫扎木禪現在又赴軍營著加恩賞銀
一百兩以示優卹

辛酉

命授厄魯特摩羅盆楚克為二等侍衛各賞銀五十兩阿玉錫策凌為藍翎侍衛各賞銀三十兩

癸亥

命拏解喀爾喀郡王青滾雜卜

上諭軍機大臣曰喀爾喀王公台吉內惟和托輝特郡王青滾雜卜受恩最深上年在軍營時將軍大臣等叅奏阿逆罪狀伊敢私自泄漏且於阿逆前百計趨承以致阿逆趾高氣揚肆行無忌後於追

緝阿逆之時觀望退縮奏稱必得兩路出師五萬方可追擒種種乖謬指不勝屈前此屢欲拏問朕念伊祖博貝舊日勞績施恩寬宥今無故自軍前擅回又揚言額林沁多爾濟達木巴扎卜等治罪之後衆心疑懼而喀爾喀數年以來皆以用兵為累以其怨望之私托為他人之語妄行瀆奏藐法已極斷難姑容必當明正典刑以示儆戒但達爾黨阿哈達哈等現在領兵前往哈薩克不便派兵

拏解著傳諭舒明阿蘭泰等如青滾雜卜撤兵回
伊游牧則此時無庸辦理俟達爾黨阿等擒獲阿
逆凱旋時降旨令伊等拏解倘伊前赴舒明等駐
劄地方即降旨拏解來京治罪舒明等務宜加意
慎密勿使洩露致伊聞風脫逃

命封都爾伯特台吉伯什阿噶什為親王

上諭軍機大臣曰都爾伯特台吉伯什阿噶什帶伊
屬人八百餘戶至額爾齊斯奇蘭庫爾圖等處遣

人前來投誠等語伯什阿噶什係都爾伯特大台
吉屢被哈薩克搶掠傾心投順甚屬可嘉著封為

親王

命傳

旨獎諭都爾伯特親王伯什阿噶什

上諭伯什阿噶什曰爾誠心感戴率領屬衆投誠甚
屬可嘉前大兵抵伊犁時爾即謁見將軍大臣正
欲加恩封賞旋遇阿逆背叛未及舉行今爾屢被

哈薩克搶擄輾轉遷徙始克內附已加恩封爾為
親王並賞給數珠荷包鼻煙壺以示優眷聞爾現
在抱病屬人又經遠行此時毋庸派兵從征亦不
必向內地遷移著即在額爾齊斯等處游牧爾都
爾伯特台吉策凌等將來即令歸至舊日游牧地
方爾等皆係同族聚處一方實為允協正不必遠
離故土徒勞往返也俟爾病痊後明歲來京入覲
更加賞賚前博東齊告稱爾遇哈薩克擾亂未知

踪跡方深塵念今覽奏不勝欣慰至博東齊並非
爾子從前在軍營時捏稱情由爾即查明奏聞

命授玉保頭等侍衛

上諭軍機大臣曰從前阿里衮赴軍營時朕曾降旨
令拏解玉保來京治罪今據達爾黨阿奏稱玉保
自知罪譴前赴哈薩克中途遇賊人交戰尚能出
力著加恩毋庸拏解投為頭等侍衛以觀後效

乙丑

諭都爾伯特輝特各部落人等遷移游牧事宜

上諭軍機大臣曰都爾伯特親王策凌等輝特郡王策卜登多爾濟等自投誠以來感戴朕恩咸知奮勉効力其屬衆亦皆安靜從前因阿逆尚未擒獲是以不即令伊等回至舊時游牧地方降旨俟明歲再行遷移今軍營陸續奏到阿逆情形窮蹙無聊哈薩克部落現欲擒獻而達爾黨阿哈達哈等統領大兵逼近哈薩克境界逆賊計日就擒當茲

準噶爾全部蕩平都爾伯特輝特人等自可各回
本部落安居樂業在素所服習之地牧養耕種於
伊等生計更屬有益現在正值收穫之期馬匹肥
壯即乘此時遷徙毋庸更俟明年此皆朕曲為伊
等籌畫生計起見著傳諭舒明巴蘭泰納穆扎爾
等傳集都爾伯特輝特王公等明白曉諭一面遷
移一面奏聞並諭伊等回本部落後善為撫卹休
養永圖生聚共享昇平之福

命封都爾伯特台吉烏巴什為貝子

上諭軍機大臣曰舒明等奏都爾伯特台吉烏巴什同伯什阿噶什前來投誠烏巴什現因患病遣人先行告知等語伯什阿噶什已加恩封為親王烏巴什亦著加恩封為貝子即同伯什阿噶什等在額爾齊斯等處地方游牧俟明年令伊等前來入覲著先行賞給數珠荷包鼻煙壺以示優眷

秋七月丁卯朔

定議賞給達什達瓦屬人牛羊事宜

軍機大臣等奏言查達什達瓦屬人六千餘口
其弟伯格里屬人一千餘口現今移至阿爾台
地方游牧遵

旨酌給官廠牲畜每戶牛一隻羊四隻驍騎校每員
牛二隻羊八隻佐領叅領每員牛三隻羊十二
隻管旗章京副管旗章京每員牛四隻羊十六
隻至宰桑鄂齊爾布林托里俱蒙

恩授為散秩大臣管轄屬衆應請量加優異每員各
賞牛十隻羊四十隻此等牛羊原為伊等孳息
生產起見其現在食用口糧交與舒明等詳察
情形酌量給予口糧數月以資接濟其牛羊等
項俱由張家口牧廠挑取解用奏入

上從之

己巳

命賞卹陣亡協理台吉齊巴克扎卜

上諭軍機大臣曰據哈達哈奏齊巴克扎卜追捕烏
梁海受傷陣亡等語齊巴克扎卜致命行陣深堪
惻憫著賞銀三百兩辦理喪事查明伊子奏聞授
為頭等台吉

內閣侍讀學士富森疏奏遷移達什達瓦屬人
游牧事宜

富森奏言臣至巴里坤會同侍郎雅爾哈善等
齊集達什達瓦宰桑鄂齊爾布林托里等遵

旨遣至阿爾台地方編作三旗令鄂齊爾等三人管轄計達什達瓦及伊弟伯格里所屬共三千餘戶七千五百餘人分為三隊給與途中牲隻口糧自六月十六日至二十日相繼起程臣沿途照看留心約束前赴阿爾台地方奏入報

聞

侍郎雅爾哈善等疏奏遣移布庫努特人等游牧事宜

雅爾哈善等奏言據策楞咨稱布庫努特人等
原同噶勒雜特部落在和博克等處居住後移
至額林哈畢爾噶今噶勒雜特部落現在烏蘭
烏蘇游牧所有巴里坤布庫努特人等亦應歸
併一處同居等語臣等隨曉諭巴圖爾和碩齊
等令其遷移計大小四百餘口給與口糧於六
月二十五日自巴里坤起程前赴烏蘭烏蘇游
牧又據卡倫送到布庫努特一名和推告稱上

年由布庫努特派兵二十名隨宰桑吞圖布前往軍營吞圖布至伊犁時將彼處布庫努特三百餘戶收獲交與和推甸巴里坤前來共大小四百餘人已至蘇伯特臺站因口糧不繼前來求給等語臣等因巴圖爾和碩齊等現在遷至烏蘭烏蘇即令和推將此項人衆暫住蘇伯特臺站令巴圖爾和碩齊等至蘇伯特臺站時帶領同赴烏蘭烏蘇所需口糧亦酌量賞給奏入

報

聞

辛未

賊黨訥默庫等正法

原任定西將軍策楞等奏言六月十一日據總
管畢里袞解到拏獲厄魯特一名訥默庫訊是
跟隨古爾班和卓之人又據叅贊大臣巴祿拏
獲葉克明安德濟特屬人一名巴朗係隨德濟

特同附阿逆行走之人俱即行正法再跟隨阿
巴噶斯之烏勒木濟等四人亦移咨巴祿即在
軍營正法其巴朗伯爾都係阿道齊所屬之人
從前阿道齊詭稱並不知阿巴噶爾等踪跡而
其屬人現在阿巴噶斯處拏獲阿道齊顯係知
情亦應一併治罪奏入報

聞

壬申

定邊右副將軍哈達哈等疏奏擒勦古爾班和卓情形

哈達哈等奏言據副都統職銜唐喀祿等報稱護送侍衛順德訥赴哈薩克至濟爾瑪台地方有特楞古特宰桑敦多克告稱我特楞古特部落人衆七百戶及古爾班和卓部落人五百戶和克沁部落人五百戶俱願投誠懇求遷往阿爾台地方游牧等語隨將敦多克及古爾班和

卓和克沁得木齊二人并奇爾吉斯宰桑送出
阿逆所屬十八人一併解至軍營臣等竊思特
楞古特等既請投誠移往阿爾台何以潛赴烏
梁海地方形迹可疑因嚴訊敦多克等供稱伊
等起程時與西路大兵交戰敗走途中又掠取
玉保所帶馬駝等物殺傷兵丁今投烏梁海意
圖搶掠再遣人會合阿睦爾撒納同逃阿睦爾
撒納亦曾遣達瓦送信古爾班和卓等語臣等

即將宰桑敦多克及得木齊二人并阿逆屬人等俱行截殺隨帶兵八百名疾赴伊等駐劄處乘其不備盡行勦滅古爾班和卓與伊弟正欲脫逃為察達克所獲訊問情節俱已供認隨將古爾班和卓及伊眷屬一併正法計獲駝四百隻羊一千四百餘隻馬二百餘匹分給効力官員人等臣等仍領兵前往哈薩克奏入

上諭軍機大臣曰哈達哈等帶兵赴哈薩克路遇古

爾班和卓等帶領戶口千餘潛往烏梁海即派官兵擒獲古爾班和卓等正法其屬人全行勦滅甚屬奮勇可嘉哈達哈著加恩授為領侍衛內大臣賞戴雙眼翎策布登扎布著晉封郡王唐喀祿著授為副都統舒赫德効力軍營此次亦屬奮勉著賞給副都統職銜扎薩克台吉三都卜多爾濟著封授公爵協理台吉策勒卜多爾濟著授為頭等台吉烏梁海副都統察達克著授為內大臣賞銀

一百兩索倫營長卓里雅薩壘藍翎侍衛敦濟勒
圖各賞銀五十兩其餘効力官兵哈達哈等查明
奏聞交部議叙並著傳諭哈達哈等俟撤兵凱旋
時派唐喀祿察達克等酌派兵丁前赴烏梁海將
逃散賊衆查辦其首惡鄂木布博博郭勒卓輝及
達瓦藏布等務期一併擒拿解京正法

癸酉

諭駐劄烏里雅蘇台辦事大臣舒明等查奏青滾雜

卜情形

上諭軍機大臣曰昨因哈達哈已領兵前往哈薩克
是以將拏解青滾雜卜之事交與舒明等相機辦
理今據舒明等奏青滾雜卜帶往兵丁俱已沿卡
倫回至各游牧惟令侍衛及綠旗兵丁至舒明處
送回礮位等語青滾雜卜現在已回伊游牧或尚
逗留他處著傳諭舒明等確查速奏

甲戌

命查辦逆黨葉克明安台吉德濟特屬人等酌量分

別賞給事宜

上諭軍機大臣曰據納穆扎爾奏從前收服葉克明
安台吉德濟特及察袞屬人等遵旨交與輝特貝
子德濟特及扎薩克阿卜達什管轄今德濟特現
同阿逆逃叛應將伊屬人等酌量賞給輝特德濟
特阿卜達什其餘請分賞喀爾喀等語此項德濟
特屬人自不應照投誠之人一體辦理且伊台吉

既已附賊伊等聞知不免妄生疑懼轉致滋事納
穆扎爾所奏甚是著照所請將此項戶口酌量賞
給貝子德濟特及扎薩克阿卜達什等各四五戶
餘俱分賞喀爾喀等為奴昨已降旨令輝特都爾
伯特人等遷往各原游牧地方此時如已起程亦
即查出遵照此旨辦理

丙子

定邊左副將軍哈達哈等疏奏擒勦逆黨達瓦

藏布情形

哈達哈等奏言據副都統職銜唐喀祿咨稱聞達瓦藏布至額爾齊斯河與烏梁海博博共謀劫掠隨帶兵五百名派索倫總管鄂博什前往擒拏隨據鄂博什在庫爾圖阿氏爾干拏獲達瓦藏布並收服所屬三百餘人駝一百七十隻馬二百四十匹內有阿逆屬下二十八人先行正法等語將達瓦藏布解至軍營經臣等訊明

從逆實情并現在糾合烏梁海博博郭勒卓輝
等欲來抗拒大兵緣由遂將達瓦藏布及同行
宰桑等八人阿逆所養喇嘛一名俱行正法其
餘人等俱照古爾班和卓人等一例辦理所獲
牲畜物件酌量賞給効力官員人等以示鼓勵
擒獲賊人之時和托輝特公多爾濟策登至軍
營告稱從前為賊拘留今始得脫懇求帶往軍
前効力行走以圖報効等語奏入

上諭軍機大臣曰和托輝特公多爾濟策登於伊犁
擾亂時力弱被擒賊散之後他人俱已全歸伊獨
未出朕意其或順從阿逆苟且偷生不獨深負國
恩且實為衆喀爾喀之辱是以降旨令將軍等擒
拏正法今覽哈達哈等奏大兵擒拏達瓦藏布多
爾濟策登始得乘間來歸前此為賊拘留身經勞
瘁甚屬可憫著加恩仍復其公爵令在哈達哈軍
營効力行走索倫總管鄂博什帶兵勦殺達瓦藏

布甚屬奮勇著加恩授為副都統

戊寅

諭遷移扎哈沁人等回住游牧地方事宜

上諭軍機大臣曰都爾伯特輝特人等已降旨令遷往各原游牧地方其扎哈沁人等亦應一體辦理但扎木禪現在軍前無約束管轄之人暫令停止遷移著傳諭哈達哈侯大兵凱旋時即傳旨扎木禪令其率領屬衆遷往原游牧地方安居樂業副

朕體卹伊等之意

己卯

命查拏擅殺宰桑恩克博羅特之得木齊綽克察等
上諭軍機大臣曰阿敏道奏稱綽和爾宰桑恩克博
羅特會集衆鄂拓克令將游牧移至朱爾都斯惟
得木齊綽克察屢諭不遵恩克博羅特親往責問
為綽克察戕害等語綽克察目無法紀務即拏獲
正法以示懲儆恩克博羅特綽和爾宰桑員缺著

吞圖布補授吞圖布員缺著達爾黨阿等擬定正陪具奏請旨恩克博羅特性本粗暴朕見時即加訓諭從前授伊宰桑特以其為彼處舊人之子至於殘刻屬衆之事諒所不免其所屬人等亦應將實在情形告知圖什墨勒等奏聞請旨乃竟擅自殺害此等惡習斷不可長吞圖布應嚴加約束毋得再生事端前恩克博羅特向哈薩克進兵時詐稱墜馬傷足居心欺妄宜為屬人所害若能如吞

圖布之勇往任事自當承受朕恩著并將此言曉諭哈薩克錫喇尼瑪等知悉哈薩克錫喇係恩克博羅特之叔恩克博羅特有無子嗣令其查明具奏

諭定西將軍達爾黨阿等查拏明噶特宰桑恩克圖等事宜

上諭軍機大臣曰舒明等奏明噶特宰桑恩克圖屬人塞卜騰帶領三十餘戶前來投誠等語塞卜騰

等著暫歸於扎哈沁游牧居住如恩克圖親身來
投亦照此辦理并將恩克圖解送來京從前厄爾
錫音奏稱恩克圖與阿逆同謀搶掠烏喇特和碩
特游牧今伊屬人塞卜騰等內附而恩克圖未見
前來未知隱匿何處既是附和阿逆之人斷不得
任其潛逃著傳諭達爾黨阿等俟凱旋時中途查
出拏解來京并傳諭衆鄂拓克等協同搜捕再明
噶特舍楞及額林沁之孫策伯克扎卜等至今並

未拏獲亦著達爾黨阿等留心查拏其或逃入哈薩克境內此等人非阿逆可比毋庸帶兵向索可即遣人曉諭令其獻出其明噶特屬人著交與沙克都爾曼濟管轄舍楞策伯克扎卜屬人著交與厄爾錫音哈薩克尼瑪錫喇等管轄

庚辰

命貝勒車木楚克扎布管理烏里雅蘇台臺站事務駐劄烏里雅蘇台辦事大臣晉慶等奏言查喀

爾喀親王得親扎卜原派管理烏里雅蘇台臺
站今據定邊左副將軍哈達哈奏請辦理馬匹
事務其臺站事務應令派員管理查扎薩克圖
汗部落貝勒品級車木楚克扎布游牧在推河
等處離臺站甚近應奏明交與管理奏入報

聞

癸未

命傳

諭都爾伯特輝特王公等

上諭軍機大臣曰納穆扎爾等奏都爾伯特輝特王公等帶領屬衆移於卡倫外居住請俟明年再移至原游牧地方等語都爾伯特輝特王公等感朕深恩約束所屬甚屬可嘉著舒明納穆扎爾等傳旨獎諭明年遷至原游牧地方務宜管轄屬人耕種謀生仍如在喀爾喀時守分安居禁止盜竊其有不遵約束者即照定例治罪所有補授盟長副

盟長及扎薩克等事奏明酌量補授其餘官員及
辦理屬人事宜應歸扎薩克辦理者各扎薩克自
行辦理應會同盟長者會同盟長等辦理朕當降
旨哈薩克令其各守邊界不得越境侵犯倘哈薩
克無故滋擾伊等以逸待勞善為防禦如有投誠
人衆即送至烏里雅蘇台軍營辦理伊等亦不得
妄生事端與哈薩克構釁務宜善體朕心永享承
平之福

命優卹班第鄂容安等

上諭大學士曰班第鄂容安靈櫬將次到京朕親臨
祭奠並著三品以上大臣齊集用昭優卹二臣臨
危致命為國捐軀義烈所昭可嘉可憫其靈櫬准
令入城各於本家停設並加恩入祀昭忠祠所有
應得卹典仍著該部察例具奏

駐劄烏里雅蘇台辦事大臣舒明等疏奏安插
達什達瓦部衆事宜

舒明等奏言內閣侍讀學士富森帶領達什達
瓦屬人七千五百餘人於六月二十八九等日
至阿拉克淖爾令臣等指定安插地方查和通
鄂博布拉罕察罕托輝等處係扎哈沁舊游牧
地甚寬展水草充足令達什達瓦部衆在彼游
牧甚屬妥協隨遣主事巴杭阿往迎富森等一
同帶至和通鄂博布拉罕察罕托輝地方指定
疆界安插奏入報

聞

甲申

命定邊右副將軍兆惠籌辦伊犁善後事宜

上諭軍機大臣曰前降旨俟擒獲阿逆後令達爾黨
阿富汗德帶領索倫察哈爾兵丁由北路凱旋哈寧
阿帶領健銳營兵丁前往兆惠處候旨但思索倫
察哈爾兵丁俱由北路撤回即不復至伊犁所有
駐劄伊犁兵丁應先行派定此時達爾黨阿應已

擒獲阿逆毋庸更派兵前往兆惠亦應將抵伊犁
著傳諭兆惠至伊犁時即留索倫兵二百名察哈
爾兵二百名健銳營滿洲兵或一百名或二百名
共兵丁五六百名為駐劄伊犁大臣差委之用其
伊犁辦事大臣亦毋庸永遠駐防一切事宜俱與
圖什墨勒扎爾呼齊等商酌妥協令伊等熟悉內
地條例俟一二年後即交伊等輪班管理所有辦
事大臣印信已飭部鑄給管理厄魯特二十一昂

吉印信頒發其圖什墨勒向用圖記之處亦著停止俟駐劄大臣撤回後此印貯於公所即令值班之圖什墨勒掌管永著為例再蒙古等遵奉黃教固勒扎係伊犁善地理宜重新廟宇遣大喇嘛前往誦經著即將此廟為大臣等辦事之地但應酌量於厄魯特內派人就近防守準噶爾原有濟喇特轄一項人員即於此內派出防守其伊犁附近地方可否發綠旗兵前往屯田亦著兆惠等豫為

籌酌奏聞

丙戌

命免治台吉阿道齊罪

上諭軍機大臣曰前據三格奏在阿巴噶斯處拏獲
阿道齊屬人應將阿道齊一併治罪等語阿道齊
並未附和叛逆早同伊兄前來投誠其屬人在阿
巴噶斯處毋庸深究況投誠人內似此者正復不
少如必一一辦理衆心易致疑懼著傳諭達爾黨

阿等免其究問

平定準噶爾方略正編卷二十九